

Révolution

REVOLUCION

Décor

Li pîce n'a pon dimpôrtance. Ca pou ièsse in salon, ène cujène ou min.me in p'tit studio (come lès kots). I faut deûs uches èt ène finièsse qu'on pou douviè. I faut ètou ène tchèyère.

Personadjes

Toine:	Li cia qu'abite dins l'maujone.	(25/30 ans)
Titine:	Si boune-amîye	(25/30 ans)
Gaspard:	In soçon	(25/30 ans)
Lisette:	Li boune-amîye à Gaspard	(25/30 ans)
Pierre:	In agent du S.C.M.L.F. (en uniforme)	(au chwès)
Sylviane:	Sôdâr en t'nûwe di combat	(au chwès)
Suzanne:	Sôdâr en t'nûwe di combat	(au chwès)

Sin.ne 1: Toine èt Titine

Toine èt Titine choute.nut li radio

Radio: Et maintenant, à l'occasion de la cérémonie impériale du solstice d'été, voici l'allocution de son altesse Filibèrt I^{er}, empereur de tout les Etats Francophones Réunifiés.

Filibèrt

(à l'radio): En ce jour du 21 juin 2127, moi, Filibèrt I^{er}, empereur des Etats Francophones Réunifiés, chef suprême par la grâce de Dieu, je tiens à mettre en garde tous les groupuscules qui tenteraient de se rebeller envers les institutions légales et qui voudraient revendiquer leurs droits à parler autrement que français, que ce soit au moyen d'anciens langages officiels ou par des dialectes et patois régionaux. Toutes ces formes dégradantes de communications sont formellement interdites et répréhensible, et je maintiens fermement l'obligation de parler français, et uniquement français. Et cela aussi bien dans les lieux publiques que privés. Il m'est pénible de devoir agir autoritairement en ce jour du solstice d'été, mais la multiplication d'actes de rebellions m'oblige, à mon grand regret, d'instaurer la loi martiale. A dater de ce jour, le 21 juin 2127, le couvre-feu se fera à 22 heures, les rassemblements de plus de trois personnes seront prohibés et les réunions à caractère privé ne seront autorisées qu'après aprobation du S.C.M.L.F., le service de conformité de la maîtrise de la langue française. De même, les contrôles de ce services s'intensifieront afin d'éradiquer tous les mouvements contestataires. ... (Toine coupe la radio)

Toine: Sacré pètard! Oh mins ça n'si pas'ra nin come ça! Vos p'léz bin m'crwère mossieu Filibèrt preûmi, ci n'èst nin audjoûrdu qui l'walon va moru dins nos maujones!

Titine: (En sèrant l'finièsse) N'causéz nin si fwârt Toine! Avou l'finièsse grande au laudje, on poureut vos ètinde!

Toine: (s'méjichant) Et bin qu'on m'ètinde! Dji sus dins m'maujone, dins m'pays! Et ç'n'èst nin zèls qui m'front tête! Dji sus walon èt fièr di l'ièsse! Et si dji vou causè walon, dji l'fraî! Et gn'a nèlu qui pôra m'èn-n'èspêchî!

Titine: F'yéz tot l'min.me atincion! Vos avéz bin ètindu qu'is z'aleut fé dès contrôles! Ni rouv'yéz nin qui gn'a wére, vosse popa a stî arètè pace qu'i causeut walon sus l'vôye!

Toine: Et i l'aveut raïson di l'fé! D'acwârd, i l'èsteut sô! Mins mi, dji n'èl sus nin èt dji sus prèsse à d'alè sus totes lès vôyes èt criyî à tærtous qu'i nos faut continuwè à causè li patwès di nosse walonîye! (I douve li finièsse èt criye) Dji sus walon èt dji caus'raî walon! Vive li walonîye!

Révolution

- Titine: (r'sèrant rad'mint l'finièsse) Tézéz-vous, bièsse! Vos v'léz bin seûr alé à l'gayole pou l'rèstant d'vos djoûs! Vosse popa ni a stî qui quinze djoûs pace-qu'i l'èsteut plin! Mins asteûr, avou li martiale lwè qui l'ôte maurticot vint d'déclarè, c'ès-st'à pèr'pète qui vos n-n'iréz!
- Toine: (Si rapaujant ène miyète) I nos faut tot l'min.me fé ène saqwè! Nos n'p'lans nin d'meurè véci sins rin fé, à ratinde qui gn'eûche ène révolution! Nenni! Li révolution, c'èst nos ôtes qui d'vans l'fé, sins qwè nos èfants ni con'ch'ront jamais ç'qui c'èst qui l'libertè!
- Titine: Nos pourans toudi leû aprinde à causè li walon!
- Toine: Qui ça fuche du walon, du flamind ou bin du provinçale, ça n'èst nin ça qu'ès-st'impôrtant! Non, nos fyans paurtîye dès "Etats Francophones Réunifiés"! L'E.F.R. come is dije.nut! C'ès-st'à dire tote l'Europe du vî tims mwins lès Russes èt lès Englès! Lès Russes asteûr is sont chinwès èt lès Englès is sont ricains! Eyèt tot lès ôtes, qui causint italien, èspagnol, allemand èt dji n'saîs pus qwè, is sont st'oblidji d'causè français! Mins tot ça, c'èst l'couminç'mint! Si on n'pou pus causè come on vou, après on n'poura pus s'abiyi à s'gout, ça s'ra tèrtous l'min.me come is auront décidé! Epwis après, nos n'pourans pus pinsè non pus! Et si on n'a ène tièsse qui n'leû r'vins nin, aléz zou! (I fait li jèsse di côpè l'cô) On s'ra tot djusse bon à boutè pou zèls èt à fé dès èfants qu'is èlèvront à leû mode èt qui bout'ront à leû tou pou li glwère èyèt l'fortune da Filibèrt èt sès soçons!
- Titine: I n'faut pourtint nin rouvyî qu'c'èst grâce à li èt à sès sôdârs qui nos n'èstans nin div'nu chinwès ou bin ricains! Sins zèls, ça aureut stî p'tète co pis!
- Toine: Mins qui vos èstéz di douce crwèyance èm' fèye! Vos pinséz vraîmint qui nos avans stî chapé pau Filibèrt èt sès sôdârs! Mins li trwèsyin.me guère mondiale come is dije.nut, ça n'èsteut qui du vint! C'èsteut in arindj'mint inte lès Chinwès, lès Ricains èt Filibèrt! Asteûr, à zèls trwès, is dirije.nut tote li tèrè èt min.me lès stwèles! Pou lès Ricains, c'èst l'Océanîye, l'Amérique, lès Englès, li Lune èyèt Mars'. Lès Chinwès, is controle.nut tote l'Asie, li Russie, in costè di l'Afrique èt Jupiter! Et pou nos ôtes, c'èst l'Europe, ène paurtîye di l'Afrique èt Saturne! Non Titine, leû guère, c'èsteut du bidon!
- Titine: Dji n'saîs pus qwè mi!
- Toine: I nos faut fé atincion èt sayi di sensibilisè lès djins aus problin.mes!
- Titine: I nos faut ètou ièsse prudent! Dji saîs bin qui gn'a bramint dès djins qui sont mau-contints èt qu'i n'faureut wère qu'ène breûje pou qui l'révolte coumince! Mins dji sus seûr ètou qu'i gn'a d'z'ôtes qui s'rint binauches di vos vinde pou s'fé bin vèye dès autorités!
- Toine: Qwè v'léz, totes révolucions a sès trêtes!
- Titine: C'èst pouqwè i nos faut couminci l'nosse sins taurdji, mins en fyant

Révolution

atincion pou qu'èle si fuche li mia possible! Ca n'sièrvireut à rin d'alè criyî à l'uche qu'on vou causè walon èt si fé rassèrè deûs minutes pus taurd!

Sin.ne 2: Toine, Titine èt Pierre

On bouche à l'uche. Toine èt Titine si rwète.nut, sbarés, èt Toine va douvièt l'uche. C'ès-st'in agent du "S.C.M.L.F". I l'ès-st'en uniforme

- Pierre: (En moustrant si carte) Service de conformité de la maîtrise de la langue française! Déclinez vos noms, prénoms et qualifications.
- Toine: Masson Antoine, technicien de niveau 3.
- Titine: Clémentine Culot, réassortisseuse de niveau B.
- Pierre: (I l'a noté lès noms sus in carnèt) Tiens? Vous êtes apparenté à monsieur Michel Masson?
- Toine: Oui, c'est mon popa!
- Pierre: Je vois!
- Toine: (Sbaré) Ah bon! Vous ...
- Pierre: Je l'ai arrêté il y a un mois! Pour écarts de langages sur la voie publique!
- Toine: Ah, c'est vous qui ...
- Pierre: Revenons à ce qui nous intéresse! Il paraîtrait qu'une conversation non française a été ouïe dans les environs. De sources plus que certaines, ces éclats de voix provenaient d'ici! Pourriez-vous me donner quelques éclaircissements!
- Toine: Bin, c'est à dire qui ...
- Pierre: Soyez plus précis je vous prie!
- Toine: C'est que...
- Titine: (côpant Toine) Subséquemment monsieur l'agent, il doit s'agir d'une méprenure! Nous ne parlissions point une autre langue que le français! Même si nous le voudrassions, nous ne le pourrassions pas!
- Pierre: C'est cela oui! Je remarque, mademoiselle, que vous faites de réels efforts pour parler un français correct. Cependant, je perçois un manque flagrant de la maîtrise du subjonctif ainsi que de grâves lacunes au niveau du vocabulaire élémentaire. Je suis donc au regret de vous arreter et de vous envoyer dans une maison de correction grammaticale!
- Titine: Non, pas ça, je vous en prie!
- Pierre: Désolé, c'est le règlement! Si vous voulez bien me suivre!
- Titine: (Suplîyant) S'il-vous-plaît! Laissez-moi tentassez à nouvia ma chance!
- Pierre: Rien de tout ça! Suivez-moi ou je devrai employer la force!
- Toine: Oh mins ça n'si pas'ra nin come ça! Dji m'va li moustrè mi, dès lacunes subjonctivales! (Toine l'apice pau cô mins Pierre arive à s'disgadji, i r'boute Toine èt sôrt in révolver èt i l'tin'ra viè Toine tot l'rèste du timps)

Révolution

- Pierre: Rebellion envers un agent en service! Votre compte est bon. Je vous arrête également! Et je puis vous assurer que vous n'êtes pas prêt de sortir de prison! D'ailleurs, un petit traitement en écoute imposée vous fera le plus grand bien!
- Titine: Un traitement en écoute imposée? Què-ç'qui c'est qu'ça?
- Pierre: Les plus grands de nos savants viennent de mettre au point un système permettant d'inculquer un apprentissage complet de la langue française! Vous en sortirez avec une maîtrise absolument parfaite de la langue de Voltaire! Bien entendu, comme rien n'est parfait, il risque d'y avoir quelques séquelles! Pour y parvenir, on doit vous lobotomiser (I r'marque qu'is n'compèrde.nut nin) vous trépaner si vous préférez, c'est à dire vous ouvrir le cerveau pour vous opérer! Et quand tout est terminé, vous avez oublié tout le reste! De toutes façons, pour ce que vaut le reste, autant le supprimer!
- Titine: Saligot! Dji n'vos lèy'réz nin fé! (Ele plonke dissus)
- Pierre: (Li r'boutant) Doucement ma jolie! N'aggravez pas votre cas!
- Titine: (Si sèrant conte Toine) Dji n'vou nin qui vos li douviéz s'tièsse! Ou adon, i faudra m'prinde avou li!
- Pierre: A votre guise, vous l'accompagnerez si tel est votre souhait. (L'ègzaminant) Et je ferai en sorte qu'après votre cure, vous me soyez entièrement dévouée!

Sin.ne 3: Toine, Titine, Pierre, Gaspard èt Lisette

Gaspard èt Lisette intère.nut sins fé d'brût. Is s'rende.nut compte d'èl situacion.

- Titine: Ni saye jamais di mète tès sales pates sus mi ou dou bin dji t'crève lès oûyes!
- Pierre: Après le traitement, vous ne réagirez plus aussi violemment chère... (Gaspard vint d'assomè Pierre avou l'crosse di s'révolver. Pierre tché èt d'meure à tère.)
- Gaspard: A ç'qui dj'vwè, i l'èsteut timps qui dj'arive!
- Titine: Maria déyi, qué daladje!
- Gaspard: Què-ç'qu'i vos v'leut?
- Titine: I v'leut douviè l'tièsse à Toine pou li fé causè li français! Et Toine i l'aureut rouvyi tot s'passé!
- Lisette: Tcharmant programme! Et pouqwè çoulà?
- Toine: Dj'aî du causè ène miyète trop fwârt, èt i gn'a ène saqui qu'a prév'nu ç't'inocint là!
- Gaspard: A ç'qui dj'vwè, i gn'a toudi dès djins prèsse à rinde sièrvice!
- Lisette: Bon, èt asteûr Gaspard! Vos n'crwèyéézin nin qu'i faureut p'tête r'wéti à l'atatchi, l'gugusse vélà!
- Gaspard: Djusse Lisette! Dijéz Toine, vos n'aurîz nin ène cwade?

Révolucion

Toine: Ratindéz ène miyète! (I réfléchi) Siya, à l'cujène! Dji m'va l'qué!
Gaspard: Dji vins avou vos! (Is sôrte.nut)

Sin.ne 4: Titine, Pierre èt Lisette

Titine: Què ç'qu'on va div'nu asteûr? On n'pou nin d'meurè véci!
Lisette: N'vos è fyéz nin Titine! On va s'ocupè di tot! Nos alans nos kèrdji d'èl zouave èt vos, vos fréz come si i n'èsteut jamais v'nu véci!
Titine: Et qué-ç'qui vos aléz fé avou?
Lisette: I vaut mia qui vos n'èl seûchêche nin! Rouv'yéz tot ç'qu'i ça passé véci, ça vaura mia pou vos-ôtes deûs!

Sin.ne 5: Titine, Pierre, Gaspard, Toine èt Lisette

Toine: (Qui intère avou Gaspard qu'a li cwade dins sès mwins) V'là ène cwade!
Gaspard: Aléz, pon d'timps à piède! Pèrd'él avou mi Toine, on va l'achêde sus l'tchèyère èt l'loyî d'sus! (Toine èt Gaspard rilève.nut Pierre èt is l'mète.nut sus ène tchèyère. Gaspard li loye avou l'cwade)
Lisette: (Qui ramasse li révolver di Pierre) Tinéz Titine, pèrdéz çoulà! Vos aléz l'survèyî! Et si boudje ène miyète ... in bon côp d'crosse dissus s'n'anète! (Ele moustre li mouv'mint)
Titine: Mins dji n'waz'raî jamais fé çoulà! Pouqwè mi?
Gaspard: Pace qui Toine èyèt mi, nos d'vans alé qué in cofe qui dj'âî catchi dins s'guèrnî!
Toine: (Sbaré) Dins m'guèrnî?
Gaspard: Ayi, dins vosse guèrnî! Vos vos sov'néz qu'in djoû vos m'avîz prusté vos clés pace qui dji n'saveus nin èyu dwârmu!
Toine: Bin ayi, dji bouteus di nût èt dji vos aveus dit qu'vos p'lîz v'nu dwârmu dins m'maujone! Mins c'èsteut ... i gn'a au mwins chîj mwès?
Gaspard: Ayi, èt c'èst ç'djoû là qu'on z'èn-n'a profité pou catchi in cofe dins vosse guèrnî!
Toine: Mins pou qwè fé? Què-ç'qu'i gn'a dins vos cofe?
Lisette: A vosse n'idéye?
Titine: Oh, ç'n'èst sur'mint nin dès cacayes di Sint Nicolès!
Lisette: Bin seûr qui non va! C'èst dès armes.
Toine: (Sbaré) Dès armes!
Gaspard: Choutéz Toine, li révolucion èst sus l'pwint di couminci! Vos avéz ètindu li causadje à Filibèrt?
Toine: Bin ayi, come tærtous dji supôse!
Gaspard: C'côp-ci, c'èst l'goute d'eûwe qu'a fait disbôrdi l'vase! I gn'a pus d'in an qui nos préparans li grand djoû! On n'a ramassi dès armes à drwète èt à gauche, èt on lès a catchi dins dès endrwèts èyu ç'qu'on saveut qu'i

Révolucion

- gn'aureut nêlu pou lès trouvè!
- Toine: Et si dj'i aveus stî mi, dins m'guernî?
- Gaspard: Avou l'bazar qu'i gna d'dins, ça m'aureut fwart sibiré qui vos l'trouvêche!
- Titine: Et qu'èst-ç'qui vos comptéz fé avou?
- Gaspard: Asteûr, i l'èst grand timps di nos è siêrvu èt di passè à l'action! Nos n'èstans co qu'ène pougnêye, mins i gn'a dès miliers d'djins qui n'ratinde.nut qu'in jèsse pou sôrti sus lès vôyes èt v'nu combate avou nos ôtes!
- Toine: Et bin, dji sus vosse-t'ome!
- Titine: Toine!
- Toine: C'èst mi d'vwèr Titine!
- Lisette: Qui ça fuche véci, en walonêye, ou bin amon lès Flaminds, lès Danwès, lès Ital'yins, lès Bulgares, lès Polonès èyèt amon totes lès ôtes contréyes, i gn'a dès comitès secrets qu'ont préparè li révolucion!
- Gaspard: Djusse après li mèssadje à l'radio, dj'aî r'çu in còp d'téléfone! C'èsteut li signal, on p'leut couminci! C'èst pouqwè dji sus rad'mint v'nu véci avou Lisette pou r'prinde li cofe avou lès armes!
- Lisette: Et eûreûs'mint qu'on èst v'nu, sins qwè, vos n'aurîz nin ieû l'ocasion d'asisté à l'révolucion èt à l'fin d'èl tiranêye!
- Pierre boudje ène miyète èt Gaspard li r'done in còp
- Gaspard: Aléz Toine, vint avou mi, on va qué l'cofe (Is sorte.nut)

Sin.ne 5: Titine, Lisette èt Pierre

- Titine: (Choulant) Comint ç'qui tot ça va s'tèrminè?
- Lisette: Nos alans gangni! N'vos fyéz pon d'bile pou ça!
- Titine: Putète! Mins combin d'djins ni s'ront pus là pou l'racontè! Combin vont moru dins st'istwère là?
- Lisette: On n'faît pon d'omelète sins cassè d'ouès! Mins di totes façons, mi dj'in.me mia moru en m'batant pou mès idéyes qui d'ièsse vikante en div'nant in bèdot dins leû troupia! Si on n'boudje nin asteûr, on d'vinra bin rade dès numéros!
- Toine: Vos causéz come Toine! Mins li, i n'v'leut qui l'criyî sus totes lès vôyes!
- Lisette: I l'aureut faît çoulà, i l'aureut bin rade stî mwât! I nos faut disfinde nosse libèrtè Titine, mins nos d'vans l'fé avou lès armes à l'mwin! Gardéz in oûye sus stî-là, mi dji m'va qué l'camion pou l'èbarquè avou lès armes! (Ele sôrt)

Sin.ne 6: Titine èt Pierre

Ele riwète li prîj'nî èpwis li révolver qu'èle a dins sès mwins! Tot d'in còp, èle si rind

Révolution

compte qu'èle dwè li survèyî èt èle pwinte l'arme sus li.

Titine: Si ... si ... si i boudje ... dji ... dji l'make!

Sin.ne 7: Titine, Gaspard, Toine èt Pierre

Toine èt Gaspard intère.nut sus l'dérène tirade avou l'cofe qui chone fwârt pesant. Is l'mète.nut à tère.

Gaspard: (Riyant, à Toine) Avou in gârde parèye, i n'pou mau d'en-n'alè!

Titine: (Qu'i n'l'èst aveut nin vèyu èt qu'a stî surprîje) Hin, què-ç'qui c'est? (En d'jant ça, èle s'èst r'tournéye en pwintant li révolver viè Toine èt Gaspard qui s'écarte.nut ossi rade pou n'nin ièsse dins l'tchamp d'tir)

Toine: Eh Titine, douç'mint avou vos n'arquebuse! Ni fyéz nin l'ouvrâdje dès sôdârs à Filibèrt!

Titine: Oh c'est vos, vos m'avéz fait peû!

Gaspard: I n'faut jamaîs d'meurè ossi près d'in prîj'nî! Sins qwè, i poureut aujîyemint vos r'prinde si arme! D'meuréz à deûs mètes, èt si i boudje in oûye ... satchéz sus l'gachète!

Titine: Dji n'waz'reut jamaîs! Non, dji n'waz'reut jamaîs!

Gaspard: Si vos n'èl fyéz nin, li i l'fra, vos p'léz m'crwère!

Toine: Rapaujéz-vos Titine, avou l'côp qui Gaspard li a d'né, i n'èst nin co prèsse di s'rèvèyî!

Gaspard: Aléz, dispèchéz-vos ène miyète, Lisette nos ratind. On va diskinde li cofe èt on vinra r'qué l'boulome après! (Is pèrde.nut l'cofe èt is sôrte.nut)

Sin.ne 8: Titine èt Pierre

Ele si mèt à deûs mètes di Pierre èt continûwe à l'visè. Ele toûne li dos à l'finièsse

Titine: Sinte Marie qui dj'â peû! Pourvu qui tot finîche bin!

Sin.ne 9: Titine, Sylviane, Suzanne èt Pierre

Sylviane èt Suzanne intère.nut pau l'finièsse sins fé d'brût. Titine ni lès vwè nin. Eles ont ène arme chacune. Ele sont st-abiyîyes come dès sôdârs qui fèye.nut l'guère. Sylviane atrape Titine pau padri en l'menaçant avou in révolver èt en mètant l'ôte mwin sus s'bouche pou l'èspèchi d'criyî. Suzanne li prind l'révolver èt coumence à rèvèyî èt distatchi Pierre. Tot en causant, Suzanne va fé l'toù d'èl pîce pou vèye si tot va bin!

Sylviane: Heureus'ment qu'on n'est là pour v'nir aider ce pauvre petit chéri!

Suzanne: Qu'est-ce que tu veux! L'manque d'action est néfaste pour ces planqués du service de conformité! A force de faire des belles phrases, ils ne savent plus se battre!

Révolution

- Pierre: (Qui s'èst rèvèyi èt qui s'frote èyu ç'qui gn'aveut li cwade, si rastampant)
J'ai ètè pris en traîte, par derrière! Je n'ai rien pus faire!
- Sylviane: N't'en fait pas mon gros lapin! Ca fait deux mois qu'on les surveille! Ils mijotent sûrement un mauvais coup, mais on les aura!
- Suzanne: Depuis l'annonce de ç'matin, tous nos services sont en état d'alerte!
- Sylviane: On a r'marqué une recrudescence d'activité dans les milieux réactionnaires!
- Pierre: Les milieux réactionnaires? Vous en connaissez?
- Sylviane: (à Suzanne) Mais qu'ils sont bêtes au services de conformité! Ca doit assurer le contrôle de la connaissance du français, et ça n'sait même pas qu'il existe des groupements à tendance révolutionnaire!
- Pierre: Mais si, bien sûr! Enfin je veux dire que je m'en doutais!
- Suzanne: Oui mais nous, on n'a pas de doutes, mais des certitudes! L'annonce à la radio, c'est pour arriver à coincer sur le fait tous ces salopards! On était sûr qu'ils n'allaient pas le supporter, alors on les oblige à faire leur révolution plus tôt que prévu.
- Sylviane: Et comme ils ne sont sûrement pas prêt, ça va foirer et on va pouvoir démanteler tous leurs réseaux!
- Pierre: Et vous croyez que cela se passera aussi facilement que vous l'imaginez! Ne vont-ils pas se défendre?
- Suzanne: Si! Mais on n'leur laissera pas le choix! (elle montre son arme) Et puis, quelques cadavres dans les rues inciteront les autres à s'tenir à carreaux!
- Suzanne: Bon, je suppose qu'ils vont revenir te chercher! Rassied-toi et fait semblant d' dormir! On s'occupe du reste!
- Pierre: Coment? Qu'est-ce que cela veut dire? Il n'en n'est pas question!
- Suzanne: Tu la fermes qu'on t'dit! Tiens, voilà ton arme! (èle li lance èt i l'atrape malaujîmint)
- Sylviane: Cachons nous ici (Ele si mète.nut à costè d'l'uche d'intréye, di façon à n'nin ièsse vèyûwe quand on douve l'uche. Titine èst toudi t'nûwe èt baillonéye pau Sylviane. Pierre si r'mèt sus l'tchèyère)

Sin.ne 10: Titine, Sylviane, Suzanne, Pierre èt Lisette

- Lisette: (Dins lès coulisses, divant d'mouchî) C'èst mi, Lisette! (Ele intère èt Suzanne l'apice èt l'assome. Ele li trin.ne viè lèye sus l'costè d'l'uche. Titine vou sayî di s'libèrè mins Sylviane li menace avou s'révolver qu'èle pwinte dissus s'timpe)

Sin.ne 11: Tèrtous

Toine èt Gaspard intère.nut en lèyant l'uche au laudje èt vont viè li prîj'nî.

- Suzanne: (En tapant in côp d'pîd dins l'uche pou li clôre) Que personne ne bouge!

Révolution

Toine èt Gaspard sont sbarés èt is ritourne.nut. Gaspard li fait en sôrtant si révolver. Pierre si lève èt lès menace ètou.

Pierre: Le moindre faux mouvement nous verra dans l'obligation de faire feu.

Sylviane: C'qui veut dire mon p'tit gars, pète un coup et je t'farci la cervelle de plomb.

Titine: Non Toine, ni vos lèyîz nin fé! Is voule.nut vos tuwè!

Toine èt Gaspard ni boudje.nut nin. Tot d'in côp, Titine arive à s'disgadji après awè doné in côp d'keude dins l'vinte di Sylviane. A ç'momint là, Pierre tire sus Titine qui tché. Toine, wôrs di li, plonke ossi rade sus Pierre, Gaspard tire deûs côp èt tûwe Sylviane èt Suzanne. I vou v'nu aîdi Toine mins on n'ètind in côp d'rèvolver. C'èst Toine qu'a réyûssi à r'tourné li révolver conte Pierre qui tché mwârt ètou. Toine tombe avou Pierre èpwis s'achîd. Gaspard a l'aîr tot pièrdu èt Lisette coumince à r'prinde sès èsprits.

Toine: (Ripèrdant sès èsprits) Titine! (I si r'lève, tot disbautchi. Vèyant Titine, i coure viè lève èt si mèt à gn'gnous à costès d'lève, en l'pèrdant dins sès brès.) Titine, èm pôve pitite Titine!

Gaspard: (Qu'èst v'nu aîdi Lisette à si r'lève) Vinéz Toine, i n'faut nin d'meurè véci!

Toine: (Criyant) Aléz-è au diâle tot lès deûs! Sins vos, rin n's'reut arivé à m'Titine!

Lisette: Comint ça! Mins vos avéz d'jà rouvyi...

Gaspard: (Coupant) Vinéz Lisette, dji crwè qui Toine a dandji d'ièsse ène miyète tot seû! (Is sorte.nut)

Sin.ne 12: Toine èt Titine + lès mwârts

Toine tint Titine dins sès brès. I l'èst prèsse à brère.

Toine: Titine, rèspond'èm s'i-vos-plaît! I faut qu'vos vikîz! Ni m'lèyéz nin tot seû!

Titine: (Qu'èst prèsse à moru. Ele cause malaujîyemint) Toine ... mi chère Toine! Promèt'èm qui nos èfants èt nos p'tits èfants pouront causè walon libremint!

Toine: Dji ... dji vos l'promèt!

Titine: Dji m'va moru...

Toine: Non, ni dijéz nin d'bièstrîyes! Nin vos! Vos aléz in r'chapè èm n'amour!

Titine: Tèjéz-vos! Dji m'va moru qui dj'vos dit! Mins tot compte fait, ci n'èst nin ça l'pus impôrtant!

Toine: Mins ... Titine ... (i vou causè mins Titine, d'in jèsse, l'arète)

Titine: Dji sus p'tète li preûmîre victime d'èl révolution! Mins i n'faut nin qui dji môrt pou rin! Aléz vos bate Toine! Aléz vos bate pou qui pus jamâs nos èfants ni dwève.nut l'fé! Aléz vos bate pou l'liberté! Aléz vos bate pou... (Ele tché mwârte)

Toine dimeure in timps à t'nu très fwârt Titine conte li. I bré. Epwis i li sère lès oûyes èt li

Révolution

pose douç'mint à tère. I s'lève èt i sôrt sins rin dire.

RIDAU